

Takornariartitsinermik ingerlataqarneq aamma inuussutissarsiutigalugu ingerlatsinermi zonenut immikkoortiterineq il.il. pillugit Inatsisartut inatsisaata allanngortinnissaanut inatsisissatut siunnersuut

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfik)

Saqqummiussissut**Siullermeerineq**

Takornariartitsinermik ingerlataqarneq aamma inuussutissarsiutigalugu ingerlatsinermi zonenut immikkoortiterineq il.il. pillugit Inatsisartut inatsisaata allanngortinnissaanut inatsisissatut siunnersuut, takornariartitsinermut inatsimmik aamma taaneqartartoq, Naalakkersuisut sinnerlugit matumuuna saqqummiuppara.

Ungasinngitsumi Inatsisartut oqallilluareerlutik takornariartitsinermut inatsit akuersissutigaa. Inatsit maanna atortuulersinniarneqalerpoq, iluarsissuteqarnissarlu pisariaqartinneqarsimalluni. Takornarialerinermut annertusiartupiloortumut sinaakkutissiineq annertusissallugu, niuerfimmilu siumut nalunanngereernerusumik pilersitsinissamik allannguutissatut siunnersuutigineqartut sulii siunertaqarput.

Takornariartitsinermik ingerlatanut 2025-mi januarip aallaqqaataa sioqqullugu pilersinneqarsimasunut piffissaq immikkut akuersissuteqarfiusoq ukiunit marlunnit, ukiunut tallimanut sivitsorneqassasoq, sumiiffinnilu takornariartitsinermik ingerlatanik poreersunik takornariartitsinermik ingerlatat piumaneqarnerat matussuserneqarsinnaatinnagu suliffinnik pilersitsinermut ukiunut pingasunut sivitsorneqassasoq siunnersuutigineqarpoq. Suliffeqarfiit pilersinneqareersimasut inatsimmik malinninnissaannut taassumap periarfissagissaarnerutissavai. Nalinginnaasumik najugaqarnissamut piumasaqaataasumik imaluunniit najukkami piginneqateqarnissap malinnissaanut tunngatillugu, angerlarsimaffik qimallugu allamiinnerit ilaanut atatillugu najugaqartussaataaannermut ilaatitsinnginnissamik aamma periarfissiisoqarpoq.

Allannguutissatut siunnersuuteqarnikkut, nunami angalasunut malittarisassanik aalajangersaanissamut inatsisitigut tunngavissaqalersitsisoqassaaq. Nunanit allaneersut asimi pisuttuarnissamut uppernarsaammik imaluunniit pisuffissani, tikitassanilu ersarinnerusumik aalajangersakkaniissinnaanissamut uppernarsaammik pissarsinissaannut kommunalbestyrelsit malittarisassiussisinnaanissaat anguniarneqarpoq.

Kommunalbestyrelsit kommuniminni nunamit allaneersut pisuttuartut pillugit tamat isiginnissuseqarnerunissaat taassuma qulakkiissavaa, kommunillu pinngortitamik, avatangiisinik, tikeraanullu isumannaassutsimik eqqarsaatiginninnissaannut ikiussallugit.

Inuussutissarsiutillit, takornarissallu arlaqartut aasamut pisuttuarfinnut pileregineqartunut tikeraassallutik maannangaat naatsorsuuteqareersut ilimagineqartariaqarpoq. Niuerfimmi

piumasaqaatit tassanngaannartumik allanngunnginnissaat qulakkeerumallugu siunnersuutigineqarpoq, zonenut nalunaarutit siulliit Inatsisartut inatsisaata matumap saqqummiunneqarneranit siusinnerpaamik qaammatit 18-it qaangiunnerini atortuulerinneqassassut.

Taamatut oqaaseqarlunga, siunnersuut Inatsisartuni kajumittumik suliassanngorlugu Naalakkersuisut sinnerlugit tunniuppara.